

DÓUTOUR JÓUSÈ FALLEN

—•••••

Lou

# FUE DE SANTO CROUS

à Garlaban



AVIGNOUN  
LI FRAIRE AUBANÈU, EMPREMÈIRE DE N. S. P. LOU PAPO  
ET DE MOUNSEGNE L'ARCHEVESQUE



**Dóutour Jóusè FALLEN**

**LOU FUE DE SANTO CROUS**  
**À Garlaban**

**Tira dóu journau Lou Gau, dóu 15 de Mai 1903.**

**Avignoun**

Mau-grat lou mistralas que li fasié lei cènt dè-s-e-nòù còup, la tèsto de Garlaban s'es aluminado, aquest an, coumo leis autre, au calabrun dóu 2 de Mai, vèio de la Santo Crous.

Avèn déjà, dins Lou Gau, fa lou raconte d'aquelo pertoucant manifestacié de la fe antico de nouéstei bouen païsan: tout s'es passa, encaro uno fes, segound la tradicién.

Afrountant la brefounié, cènt valènt d'aquélei païsan, de vièi coumo de jouine, e même quàuquei gèntei damisello d'Aubagno, pleno de couragi, esperavon l'ouro soulenno de l'abrasamen.

Èro bèu, dins la tristo travessado que fèn aro, de vèire aquéu pople ounèste, tèsto clino e lou ginous sus lou roucas, respouendre recuï, cinq fes à-de-rèng, au brave mèste Francés Roubaud qu'en boueno lengo dóu terraire disié Noueste Paire que sias dins lou cèu e Vous salùdi, Mario.

Èro bèu à faire toumba de plour e siguè coumo d'esperélei que vengueron alor, au rounflamen de la mistralado, s'entre-mescla aquéstei paraulo d'eici:

BRAVEI GÈNT,  
FIÉU VALÈNT DE PROUVÈNÇO,

Nous veici douc encaro uno fes sus la mountagno que la fe de nouéstei rèire a de tout tèms encimela d'uno crous! Nous veici tourna-mai davans lou lignié grandaras que chasco annado, à parié jour, quand lou soulèu vèn de s'ennega peralin dins leis oundo salano, s'abro dins la miejo-escuresino dóu vèspre e fa saupre à tutto l'encoutrado que leis umble, que lei nòblei païsan de Garlaban, de la baisso e de l'auturo, soun sèmpre que mai fidèu ei bellei tradicién de sei paire.

Vouesto presènci en aquesto ouro sus la cimo de nouesto mountagno, aqueste moulounas gigant de branco que cadun de vautre a tout-escas mounta la siéu gaiamen pèr de peniblei draiòu, e vouesto bravado tant nourrido qu'estrementisse l'èr despuéi bèn quàuqueis ouro, tout acò sèmbllo bèn simple à vautrei, meis ami, e tout acò pamens fa gau tant-e-puei mai à moun couer de fièr prouvençau e de francés.

Sabès proun qu'es gaire dins moun gàubi lou devoutùgi, que m'es arriba même de crida cènt misericòrdi dins la sourniero ounite bèn d'autre se cresien dins uno esbléugissènto clarta. Pouédi douc pas vous parla coumo fasié lou brave mèste Enri, aquel ome santas que tóutei lou regretan, ni-mai coumo lou bouen prèire qu'à l'an passa nous faguè, eici, un sermounet tant courous; mai sian dins uno passado que, quicha pèr l'endignacien, tout crestian, e n'en siéu un — pòu parla 'mé soun couer davans la Santo Crous.

Sias pas sènso saupre que sian en dòu: vènon de trespassa lei liberta sacrado e la fraternita, aquélei principi sant que lou crestianisme nouestre èro vengu aprene ei pople, que n'avien fa, nouéstei gouvernaire, lei foundamento generouso e sublimo de nouesto coustitucien naciounalo.

Ai! las, à pichoun fue, nous leis an facho mourir!

Jitas leis uei sus lei routo de l'eisil: alucas aquélei lònguei tiero de mouine entristes que s'aluenchon, l'amo matrassado, rebuta pèr la patrò meirastro o pulèu pèr leis aloubati que si creson de l'encarna.

— Buai d'aquélei manjo-crucifis! cridon lei nègo-bouen-Diéu pèr aro triounflant; buai d'élei que fasien au pople tant de mau e vèngue à nautre soun inmènso fourtuno!

Ah! soun inmènso fourtuno! aquéleis afrous richas que couchavon sus la duro coumo vautre dins vouéstei bastido, que si nourrissen coumo vautre dóu liéume de la terro, soun inmènso fourtuno, valènt-à-dire sei tresor d'amour pèr lou prouchan e sei bouéneis obro, leis empourtaran em'élei dins lei païs estrangi, e s'avèst jamai vist, vous-autre, lou mau que fasien au pople, lou mai bourna veira proun lèu lou bèn que faran plus.

E l'oubrié tant creserèu, sàbi qu'eici n'a ges, que pren pèr paraulo de rèi lei proumessò dessenado que li fan d'ùnei que l'a, destriara deman que coumo pèr lou passat, pu duramen bessai que pèr lou passat, devra bagna soun pan de sa susour: es, acò, la lèi inmancable de la creaturo e coumo tout l'animalun dèu bousca sa mangiho, l'ome long-tèms encaro devra bousca la siéuno!

Em'acò lei liberta s'envan e nous rèsto plus même aquelo de garda nouéstei cresènço que pamens fan de tort en degun.

Vuei barron lei mounastié seculàri ounite espelissèron tant de nòbleis idèio e que fuguèron toustèms lei fougau de la sciènci e l'ounour de la patrò; barron lei mounastié qu'an fourma lei proumiés educaire dóu pople e n'en fouero-bandisson même lei sàntei fiho que dins la plus pauro bastido coumo sus lei prat bataié sabon tant bèn adouci nouéstei mau.

Barraran deman nouéstei santuàri, se pouedon, lou vouestre tant poulidet de Bèudina es-ti pas déjà marca pèr acò ? e pas-un de vautre pourrié m'afourti que sera libre, l'an que vèn, de veni mai sus aquesto tèsto de Garlaban, à parié jour, festeja la Santo-Crous toujour drecho.

Es que sabèn ço que nous espèro au recouide dóu camin ?

Vaqui perqué vouesto presènci eici tant noumbrouso en aquesto ouro fa gau à moun couer de francés e de fiú de la Prouvènço afouga de nouéstei vièiei franqueso; vaqui perqué, quouro m'en an prega mei coumpagnoun de roumavàgi, ai pres emé plesi la cargo flatouso pèr iéu de vous n'en dire gramaci.

Davans que de li bouda fue, alucas encaro un pau voueste lignié; n'a, cadun de vautre, mounta qu'uno branqueto e regardas pamens coumo es bèu, coumo es grand: dins un vira-d'uei van lengueja tant aut sei flamo e sei belugo que n'en seran alumina lei crestén de l'entour emai lei plano.

Eh! bèn, vènon, lei meichant dóu siècle, d'atuba, élei tambèn, un inmènse brasas, un encèndi espaventable qu'empuron de toutei lei pourridié e que nous estubo afrousamen; mai se voulès, lei bràvei gènt, e sabès que dins noueste bèu païs l'eissame dei bràvei gènt aclapara toujour la sequèlo dei meichant, se voulès aduerre cadun vouesto branqueto redoulènto à l'inmènse brasas, agués fisançò: La flamo clarejara lèu dins l'espàci, pu vióulento bessai, mai purificativo, es-ti pas lou fue que purifico l'or dins lou fournet ? e quand lou ventaras aura 'mpourta lei cèndre, li trouvarés dessouto un recalieu sacra, toujour ardènt, aquéu de nouéstei liberta santo que soun imperissabkö, se sabès lei defèndre.

Lou pople es soubeiran un jour de cènt en quatre: bràvei gènt, vous n'en rapelarés e coumo sian la part majouro, auren puei la vitòri.

Sias, vautre, lei cepoun e l'espèr de la patriò!

Anen, zóu! que flameje, aro, lou fue de Santo-Crous e que soun lengàgi misti vague dire en pertout que soun pancaro embastardi lei fiú de la Prouvènço e que renègon ni sei dre d'ome libre, ni lei crèire de sei paire.

Vivo dounc la patriò!

Quant à Diéu, lou sabèn inmourtau.

© CIEL d'Oc – Desèmbre 2004